

# ZUD

## Ñeti garosikao

Zud ñeti epovoz ñeti kapot ev. Met Zemis popuz bosip Zud ñeti epov menahap pi amun Iesuz bosip ok. Met aban moregari Iesuz ñetiv bapat batat añarabon mañat ba in balavï metoohaek, 2 Pita Pitahö ñeti menahavoz zut, Zud amun tapuvoz homet ñeti epov menah.

Met Iesu abarah hasahan krismasañ 50-z zut bon tahan pi ñeti epov menah.

---

## Zud ñeti epov menah

<sup>1</sup>Met ne Zud, Zemis popuz bosip, ne Iesu Kristoz gog abanap ev. Met ne ari God ba ou avatahan pim ñarohol ravegin, God arimaz zakep tat hezan, Iesu Kristo tin arimaz korav ravat hezavoz homet ñeti epov ev menomaz toh.

<sup>2</sup>Met God zakepivor masakao ari anohopenen lop tinarizaronañ hepekez pov ariti an pap manohopanez ne zait toh.

### Iesuz ñetiv bapat batoohao ev

#### *2 Pita 2:1-18*

<sup>3</sup>Met nem hat tinari, ne ñeti ahö nao bon, oñ epat arin añom. Met dari houlori Iesuz ñetiv bat tamegin, God maot pimeri ba avatamah-ñeti poñikanañ nao menat arin añomaz ne zait tat homet hehö. Oñ petev God hodad modao ne nanahaek, epat arin añomaz ev toh, Met Godiz homeo barotap batat tovai sookaz ñetiv dari pim añarab hatevetet bahorë hat hekaz haanahan hezaek, dari ñeti pat nao bahoneo navatotü. Oñ petev aban nari ñeti pov bapat bavatat hamah, povoz ari kez tat pim ñeti tin nen povohar bat het modarin tinam mañohozei. <sup>4</sup>Met arin añoh-epovoz kapot ev, Met aban nari parum lop horirizaro ba iz batat ñeti moregao arin añapanen, parunañ honeo ravepekez hat arim ñaravatak emat hez. Met aban hamoh-pori Godiz ñetivoz tin hom namee het epat moreg hamah, “Met dari Godiz masakavok samegiek, pi darim horiñ ol betet hañiv naetotuz hahan hez, povoz darimauz zaitivok takaz tairañ am tovai sohok.” Pot paru haovai Iesu Kristo darim ahö nenap ravat hez-

pop kos rez manat, “Pi darim ahö bonop ak,” pot hamah. Met aban pot hahopanez pori rotap hañiv bat hori ravapanez batam ñetiv hamenahan hez.

<sup>5</sup>Met paru God kos rez manamah-pori hañ horiv tokat bapanez ñetiv hahan hezao ari hahodad, oñ unun manepek hezavoz ne arin epat añom. Met batam Israel añarab Izip zeisik hehan bahori metat kakam ahov metoohan, God paru meñizat mapori ze posikanañ baverevahan emah. Met tokat paru tapurihanañ nari pim mañahao elat barotap navat hehan pi pori men ñomah. <sup>6</sup>Met enzol nariz tahat amun añom. Met batam enzol tin heh-porihanañ nari Godihö paru nao tapanez mañah-pot paru nat, oñ paru pi ritou metapan hat pim parun mañahao elah. Tahan pori biñinañ demat kutur ahotaz lopotak betehan poek hez. Met tokat God ñevok evizapanez hahan hez-aliz ahö posik hañ horiv metapanez au mañahan hez. <sup>7</sup>Met parum pot pim ñeo elahavoz zut, batam Sodom ma Gomora ze ahö potakaroh añarab heharir, ze potakaroz totoi hehari, paru Godiz ñeo elah. Tahapuh paru betezam nae nari bohot het abanari aban modariz zait tat paru honeo hori ravat pot nañ tooh. Met pot tooh-pori hañ horiv metapan hat, God it pohao ñadohot hezañad rañizat ze ahö potakaroh betehan paru mapori ñadat ñomah. Met pot metahavoz zut ganö dari taput etapanen itiñadek ñadak hezavoz homet, hodad tinao bat het tinam tovai sohok.

<sup>8</sup>Met batam hori toohan hamoh-epovoz zut petev arim ñaravatak aban emat hez-pori am taput tamah. Met parum hodadeo ginohan tamahan Godiz hahan hezat elat, parumauz zaitivok berevamahat hori ahoñ tamahan parum heriñ hori ravamah. Pot paru tohot Godir aban nari parum korav ahoi hepenez kaev ravamah, ma enzol aliz ahö tinavonañariz batiu tiu batohot, “Btezari ok,” pot parumaz hamah. <sup>9</sup>Met enzoliholoz ahopuz abatao Maikel batam aban Moses ñomahan Seten moreg popur Maikel parupihanañ tairap Mosesiz heris bapanez ñeti pov nae nap hah-porah Maikelin ñai mañat epat mañah, “Pi ham abanap evog, ni heken neohö bom.” Pot mañahan Maikel moreg popuz hori hahavoz homet pimauhö batiu tiu batat ñeti hañ hori nao piin namañ, oñ epat mañah, “Darim Amip pimauhö ñeti hori hañ-okovoz hañiv tokat ni nanapan.” <sup>10</sup>Oñ aban arinañ hezan hamoh-pori Maikel tin pot mañahavoz zut nak hezari ok. Tat paru tairavoz kapotaz tin hodad nat hez-povoz ñeti hori povor kao am hahot hez. Pot hamahari bol bedehol kapotaz hodad nat kut het betezam sat em tamahavoz zut, parumauz zaitivok berevamahat tamahan, hori poñihö tokat hañ horiv metapanen horiek sapanez nonor ba ou batamah.

<sup>11</sup>Ui mai zakep oe, met paru batam hori tooh-poriz zut, petev arimatak emat hez-pori tamah. Met aban Ken Godiz ñeo elat pimauz zaitivok soohavoz zut tamah. Ma aban Belam amun moni ahos bohopanez

hat añarab modarin horiñ tohopanez mañairoohavoz zut, petev paru taput tat modarin horiñ mañairamah. Ma aban Kora popuhö Moses Israel añaraboz ahop ritou metapan hat ñeti kezao hahan, God pi men ñomahavoz zut paru arinañ hez-pori amun ñomat hori ravapanez nonoroh samah. <sup>12</sup>Met ari Iesuz añarab pim eñizahavoz homet honeo topourat gipiz namegirah, paru pori amun emat ari tin honeo het nepekez hom namee, oñ parumauz tohopanez nenavoz homet hadehol gipiz napanez rez kek tat namahavoz zut paru biñavonañ het rez kek tat ahoam namahapuh, parum lop horirizaronañ arim topour poñ bahori batamah. Met parum hori pot tamahavoz homet epovoti zu tat ne añom. Met parum hezao utar bonorah un emamah-navoz zut hez. Met un pot nao emamah-porah utar napel hezan darim adañ tin rapapanezat narav tamahan, hadao urat un pov am betezam basat em tamahavoz zut paru pori ari tin naet het betezam sat em tamah. Ma zi named uloñ navad het ñu ravamahan maup batiz beteamahavoz zut, paru ñomat hori ravapanezat hez. <sup>13</sup>Ma iveri ñai rezat dugdug tamahapuh elamahan kulupiñ emat ourah iv haravesik togü manat oraezan eteamegivoz zut, paru aban pot tamah-pori ourah hori tovai emamahan dari eteameg. Met zeiz nañ abarah berevat sat em tamahavoz zut, aban pori añarab moreg metohopanez hat zeisikaroh sat em tamah. Met paru pot tamahari map kutur manat hez-potak sat hepenez God hahan hez-poek betepanen sat pohazao het hepan.

### **Hori tamah-pori hañ horiv bapan**

<sup>14</sup>Met Adam popuz ro puputip Zaret, met Zaret popuz rop Inok heh. Met Inok popuhö aban tokat berevat hori tohopanez poriz hodad tat epat hah, “Hatevetei, met darim Amip pim enzol tin map ahovokaronañ erapan. <sup>15</sup>Tapanepuh ev hamaraha añarab hez-mapori ñevok evizat an etapan. Tat tairari pimaz hom namee het betezam hori povor kao tamah, ma Godiz kaev ravat pimaz ñeti horiv hamah-pori hañ horiv metapan.” Met aban arinañ petev hez-poriz tamahavoz Inok batam pot hahan menahan hez. <sup>16</sup>Met paru aban pori parum modariz ñeti horiñ moreg hat, “Paru okori hori tamah,” pot hamahapuh parumauz abatañ bat hel batat parum zait horiñiz eñatak tovai sohot hez. Ma modari tin hepenez hom namee, oñ parum mod porin mañohopanen parum hahopanezat tovai sohopanez hat sesekor mañamah. Pot aban hamoh-pori tamah, povoz tokat hañ horiv paru manapan.

### **Tin tovai sohopanez mañah-ñetiv**

<sup>17</sup>Met nem hat tinari, batam darim Amip Iesu Kristoz aposor abanari arin epat añoohavoz homei, <sup>18</sup>“Met Kristo maot erapanez aliz metë pos totoi ravovai sohopanen, aban nari Godiz hom namee het parumauz

zaitivok homehopanezat tovai sohopanez pori het ari pimaz zait tat hepekezariz kek hat ñebul arin añohopan.”<sup>19</sup> Met aban pori ari pot etohopanez aposor abanarihö arin añooh-poriz loporizaroh Godiz Pul Tinap nakez, oñ parumauz homevok berevamahatam tovai samahaek, ari Iesuz añarabon ñeti moregañ añat ba everat bamain main avatamah.

<sup>20</sup> Met nem hatari, parum tamah-pot ari tovai totunei, oñ ari Iesu Kristoz homeo badae batat hez-pov tin mapov ok, povoz rez kek tat pim home tin pov arim loporizaroh ahö ravohopanezat tohozei. Tat pim Pul Tinap ari bakez avatohopanen kez povonañ het piinmañ mañohozei.

<sup>21</sup> Met darim Amip Iesu Kristo maot erapanez petev ari ñai bizat etet hez-eparah arim hepekezavoz tin korav het God arimaz lopori anat zakep etamahavoz homet hezei. Pot homehot hepeken pi maot erat arimaz zakep tat avat tinaek eñepanen, pinañ honeo pohazao tin het hepek.

<sup>22</sup> Met paru añarab tairari Iesuz homet, Pim ñetiv tin bat hekazao, ma upai nao ev, pot homehopanezari barotap batohopanez hat zavaruvonañ het ñeti tinao ari parun mañohozei. <sup>23</sup> Ma añarab nari hori povor kao tovai sohopanepuh ganö paru itiñadek sapan hezavoz paru Iesuzari ravat non tinaoroh sohopanez mañairohozei, oñ ganö parum hori tohopanez poñin ari amun etet hori taput tohopek hezavoz, hori poñikanañ ari bazei manat hodad tinavonañ het ñeti tinao mod porin mañohozei.

### Godiz biñ mañookazao ev

<sup>24-25</sup> Met God nenap dari tin etamahapuz homet, “Tin etameñ,” pot piin mañovai sohok. Met dari horivonañ hegin pi darim Amip Iesu Kristo meehan erat darim hori toog-poñiz homet hañiv bat ñomah, povoz God dari maot pimeri ba avatamah. Met pi rekot darimaz tin korav hakezaek, dari maot ñodat hori naravotü, oñ pi tokat avapanepuh pimaunañ karar pim alizavok eñepanen biñavonañ tin hekan darimaz pi ñeti hori nao nakaotü. Met pi batamohanañ alizavor kezavonañ het petev am hez, ma tokat pi am hepenezap nonair nai mapotur maporiz korav ahop ravat hezavoz dari homet piin biñ mañovai sohok. Rotap ev añamoh.

(Zudiz ñetiv menahat nen ev.)